



UNIVERSITÄTS-
BIBLIOTHEK
PADERBORN

Universitätsbibliothek Paderborn

**D. Petri Chrysologi Archiepiscopi Ravennatis, viri
eruditissimi atque sanctissimi, Sermones In Evangelia De
Dominicis & festis aliquot solemnioribus totius anni,
insignes & peruetusti**

Petrus <Chrysologus>

Lvgdvni, 1623

De parabolis inuentæ margaritæ, & sagenæ missæ in mare, Sermo XLVII.

[urn:nbn:de:hbz:466:1-50232](https://nbn-resolving.org/urn:nbn:de:hbz:466:1-50232)

secundum diem tentationis in deserto, ubi tentauerunt me patres vestri: probauerunt, & viderunt opera mea. Quadraginta annis proximus fui generationi illi, & dixi: semper hi errant corde: Ipsi verò non cognouerunt vias meas: quibus iuravi in ira mea, si introibunt in requiem meam. Cum dicit, hodie, te conuenit, ad te loquitur, quicumque homo es auditor, ne audita voce eius, contemptus reatum, contumaciæ crimen incurras: quem non præcepta, quem non correxit exemplum. Nam ob hoc Iudaicam duritiam longo sermone narrauit, vt te Christiane faceret cautiorem, cui non quadraginta annis tantum conuersatur, & cohabitatur Deus, sed toto vitæ tempore paret, & militat ad salutem.

*De parabolis inuenta margarita, & sagena missa in mare,
Sermo XLVII.*

CHristus Deus noster, quod cœlum, terram, mare, & in eis magnas, multas, varias condiderit creaturas, miranda potentiæ suæ documenta monstrauit: quod verò humana suscipit, agit hominem, intrat tempora, transit ætates, docet verbo, virtute curat, similitudines loquitur, proponit exempla, affectus nostri in se pondus aperit: inesse sibi dilectionis humanæ pandit ineffabilem charitatem. Hinc est, quòd cœlestia terrenis commendat exemplis: de præsentibus sapere dat futura: inuisibilia visibilibus insinulat argumentis, probant hoc similitudines, quas nobis hodie Euangelicus clamat auditus. *Simile est* Mati. 13.
regnum cœlorum homini negotiatori querenti bonas margaritas: inuenta autem vna preciosa margarita, abiit, & vendidit omnia quæ habuit, & emit eam. Neminem qui hoc audit, nomen negotiatoris offendat: hic negotiatorem loquitur qui dat misericordiam, non qui dat scœnoris semper vsuram: prouidentem or-
L namenta

namenta virtutum, non irritameta vitiorum, gravitatem morum, non lapidum pondera perferentem, honestatis, non luxus monilia portantem, gestantem non voluptatis pompam, sed insignia disciplinae. Ille ergo negotiator has cordis & corporis margaritas proponit, non humano commercio, sed diuino exercens: non ad praesens commodum, sed vt futurum mercetur: non ad terrenam gloriam, sed caelestem: quatenus caelorum regnum possit virtutum praemio comparare, & innumeris bonis vniam redimere perpetuae vitae margaritam. Adiecit autem similitudinem Dominus dicens: *Iterum simile est regnum caelorum sagena missa in mare, & ex omni genere piscium congreganti: quam cum impleta esset, educentes, & secus litus sedentes, elegerunt bonos in vasa, malos autem foras miserunt. Simile est regnum caelorum sagena missa in mare.* Similitudo haec prodit cur in apostolorum piscatores elegerit Christus, & captos piscium fecerit hominum piscatores, vt diuini iudicij typus arte piscatoria monstraretur. Pisces congregat captura confusos, sed in vasa discretio dat electos: sic vocatio Christiana iustos, & iniustos, malos, bonosque congregat, sed bonos, malosque electio diuina discernit. *Simile est regnum caelorum sagena missa in mare.* Ad huius saeculi mare tumens pompa, elatum vertice, vndosum sectis, inscitia fluctuans, clamoribus litibus, fremens ira, saeuum perfidia, peccatis naufragum, impietate demersum, misit piscatores suos Christus, hoc est, Petrum, Andream, Iacobum, Iohannem, probatos arte, cum dicit: *Matt. 4. Venite post me, faciam vos fieri piscatores hominum.* Misit ergo piscatores suos reuera portantes praecipis legalibus, & Euangelicis innodata monitis, circumcincta virtutum donis, & gratia dilatata, Euangelico sinu

eo sine congregantia sine fine capturam. Hoc tempus modo, hoc agitur fratres: per gētes, per populos Christi retia nunc trahuntur, & ducunt, confusas toto orbe credituras sine discretione personas. Sed quia sæculi vicinus est finis, & ad iudicij littus capturæ nostræ retia iam propinquant, pisces, hoc est homines, qui profundo sæculi discursu feriato ac libero vagabantur, siccitate littoris, hoc est, finis propinquitate turbati, tota se rerum dispensatione collidunt: vidētes impias gentes triūphis succedentibus ampliari, angustiari captiuos toto orbe populos Christianos: impios prosperis gaudere successibus, pios malorum continuata successione calcari: subdi dominos seruituti, dominari dominis seruos, rebelles filios in parentes, senes iuuenibus esse contemptui: omnēque naturæ statum, vitæ ordinem deperisse. Sed hæc cum ita sint, fortes non turbant: imò infirmos turbant, fortes turbare non possunt, quia sumunt vires de similitudine, fortitudinem de figura. Eiecti de profundo pisces parum quidem in littore sui confusione voluntur, sed citata discretio dum malos abiicit, eligit bonos: facit bonos, non turbat, brevis ista, & citò transitura confusio. Ista discretio superna quæ dat malos pœnis, bonos rapit ad honorem, impios deducit ad tartarum, pios transmittit ad regnum, patres, senes, iustos, electos, omnes de contumelia exigua perpetua gloria consolatur. Probat hoc autem comparatio ipsa cum dicitur. *In consummatione sæculi exhibunt angeli tui, & segregabunt malos de medio iustorum.* In consummatione sæculi, qui cōsummationem sæculi credit, qui de sæculi minoratione causatur, qui confidit mansura succedere, habere quid quærit transitura? Fratres, mundus de fine principium sumit: sine innouatur, non deficit creatura: seculum deficit

non creatori, sed crimini: neque iustis, sed peccatoribus finiuntur elementa. *In consummatione seculi exhibunt angeli.* Parere iustis, nec quilibet dubitet sanctis angelos esse parituros, quibus obsequium suum promittit & Christus: Christi vox est, *Præcingam me, & ministrabo vobis. Exhibunt angeli Dei & segregabunt malos de medio iustorum.* Portate iusti, portate, imò inducias iusti date, brevis ista mixtura longa separatione pensabitur. *Separabunt malos de medio iustorum, & mittent eos in caminum ignis.* Ecce qui eiciunt vicinos, qui expellunt hospites: qualem sibi eligunt mansionem: ecce qui sibi hic delicias pauperis fame, pœnis præparant alienis, ibi ignem sibi quantum de exigua voluptate succendunt, *Ibi erit fletus & stridor dentium.* Quàm malè stridet ibi, qui hic malè ridet: & qui nunc malis pauperum gaudet, de bonis pauperum tunc lugebit, quia potuit cum paupere gaudere, sed noluit: vos autem fideles gaudete in domino semper.

In illud Matthæi, Venit Iesus in patriam suam, & cat. Et de invidia,

Sermo XLVIII.

EVangelista hodie Iudæorum circa Christum proditurus invidiam, sic cœpit: *Venit, inquit, Iesus in patriam suam, & docebat eos in synagogis eorum, ita ut mirarentur & dicerent: Vnde huic sapientia & virtus? Nonne hic est fabri filius? Nonne mater eius dicitur Maria? & fratres eius Iacobus, & Ioseph, & Simon, & Iudas: & sôrores eius nonne omnes apud nos sunt? unde ergò huic omnia ista? Non sic nubes cœlum, nox diem, solem caligo, quomodo mentem cæcat, & tenebrat invidia. Liuor hoc Iudaicus probat, qui Christi sapientiam miratur, virtutes stupet, attollit opera, dicta suscipit,*